

Qassusersorluni qaleraliniarsinnaanermut piffissaliussaq atuutsinneqartok allangor-tariaqarneranik apeqquteqaat aallaavigalugu Inatsisartut oqallinnissaannik siunnersuut.

(Aleqa Hammond, Nunatta Qitornai)

Akissuteqaat

(Aalisarnermut, Piniarnermut Nunalerinermullu Naalakkersuisoq)

Aleqa Hammond Nunatta Qitornaaneersoq apeqquteqaat aallaavigalugu oqallinnissamik suliassaqarfimmi qulaajaanissamut periarfissiiffiusumik siunnersuuteqarsimanera pillugu Naalakkersuisut sinnerlugit qutsaviginiarpara.

Siullermik erseqqissassavara Sinerissap qanittuani qaleralinniarneq pillugu Namminersorlutik Oqartussat nalunaarutaani § 10 naapertorlugu qassusersorluni qalorsuorsorluniluunniit inuussutissarsiutigalugu qaleralinniarneq akuerisaanngimmat. Qassutaarsiutit ningittakkanut sanilliullutik immap naqqani napittornissaat ilimanaateqarnerunerat tamatumani tunngavilersuutigineqarpoq. Qassutaarsiutit tamakkuninngalu qalluineq ajornartorsiortitsisaqaat, kiisalu qassutinik napititat pitsaannginnerunissaat ilimanaateqarnerusarluni. Qeqertarsuup Tunuani qassutaarsiutinik qalluilluni misileraaneq juulip qaammataani Pinngortitaleriffiup aallartissavaa qassutaarsiutit qanoq amerlatiginerat qaleraleqassusermullu qanoq sunniuteqartarnerat annerusumik paasisaqarfiumallugu.

Kisiannili § 10, imm. 2 tunngavigalugu kommunit ileqqoreqqusaliorlutik sumiiffinni killilinni qassusernerup inerteqqutaanera immikkut akuersinikkut atorunnaarsikkallarsinnaavaat. Akisussaaffik taanna kommuninut isumagisassangortinneqarsimavoq. Tamatuma kingunerisaanik kommunit qassii ileqqoreqqusatigut ukiup ingerlanerani piffissami sumiiffimmilu aalajangersimasuni inuussutissarsiutigalugu aalisartunut qassusersornissamut periarfissiisimapput.

Aalisarnermi taama uatsinnut pingaaruteqartigisumi malittarisassat eqaatsuullutillu sumiiffinni atugassarititaasunut avatangiisinullu naleqqussagaanissaat Naalakkersuisunut pingaaruteqarpoq. Taamaammatt kommunit ileqqoreqqusaliorlutik pisariaqalersillugu sumiiffinni aalajangersimasuni § 10-imik malittarisassanik immikkut ittunik periarfississimavavut. Kommunimmi kiisalu najukkami aalisartut sumiiffitsik allanit ilisimaarineruaat.

Qaasuitsup Kommunian 2011-imi ileqqoreqqusanik atortussanngortitsivoq Uummannami, Upernavimmi Qeqertarsuullu Tunuani novemberip ulluisa aallaqqaataaniit decemberip nagataanut taavalu januaarip aallaqqaataaniit apriliip naaneranut qassusersorluni qaleralinniar-nissamut periarfissiisumik. Kommunit nutaamik killeqarfeqalernerisa kingorna ileqqoreqqusat nutarterneqarnissaat pillugu Naalakkersuisut kommuninik oqaloqateqarsimapput, erseqqis-sarneqassaarli kommunit namminersorsinnaatitaanerata ineriartortinneqarnerani akisussaaf-finnut kommuninut isumagisassangortinneqarsimasunut Naalakkersuisut akuliuttannginnis-saat pingaaruteqavissuummat.

Avannaata Kommunianiit ilisimatinneqarpunga kommunimi qassusersorluni qaleralinniar-nermut ileqqoreqqusat maanna nutarterneqaleruttormata. Naatsorsuutigaara siunnersuutit piffissami qaninnermi naalakkersuisoqarfimmiit inatsiseqarnikkut nalilersorneqarumaartut.

Kommune Qeqertalimmiit ilisimatineqarpunga sivitsuinissaq kommunalbestyrelsimit akuersissutigineqarsimasoq suliarlu nangeqinneqassasoq.

Apeqquteqaat aallaavigalugu oqallinnissamut siunnersuummi oqaatigineqartut malittarisasat atuuttut najukkami pissusiviusut aallaavigalugit naleqqussarneqartariaqarput. Uangattaaq isumaqataalluinnarpunga. Kikkullu kommunimit najukkami pissutsinik ilisimasaqartumit tamatumunnga paasisimasaqarneruppat?

Pissutsit assigiinngittarnerinut assersuutigissavara Niaqornaarsummi NAPP-miit qassuser-sorluni qaleralinniarnep sivitsorneqarnissaanik kissaateqartunit saaffigineqarnera. Aammali Ikerasammi Aalisartut Piniartullu Peqatigiiffianniit najukkami eqqaanni piffimmi aalajangersimasumi qassusersornerup unitsinneqarnissaanik kissaateqartunit saaffigineqarpunga. KNAPK-mittaaq paasitineqarpunga qassusersornerup sivitsorneqarnerata kingunerinik paasinnittarnerit sumiiffimmiit sumiiffimmut allanngorartartut. Qassusersornerup sivitsorneqarnissaanik kissaateqarluni najukkami peqatigiiffinnit saaffiginnissutaasartut saniatigut nakkutigineqanngitsumik atuinerup taamalu qassutaarsiutaasartut kingunipiluusa isiginiarneqarnissaanik qassiit kissaateqartarput.

Royal Greenlandittaaq qassusersornerup ukiup ilaannaani ingerlanneqartariaqarneranik paasitippaanga, kiisalu aqutsiveqarfinni pingasuusuni piffissat qassusersorfissarititaasut immikkoortillugit aalajangersartariaqarnerarpai kiisalu sivisunerpaamik ukiup affaani qassusersorneq ingerlanneqarsinnaasariaqartoq oqaatigalugu.

Ningittagarsorluni qaleralinniarnep apriliip naggataata kingorna ingerlaqqissinnaavoq qassusersornerlu novemberip aallaqqaataaniit aallarteqqinneqarsinnaalluni. Taamaalillutik aalisartut ukioq naallugu qaleralinniarnissamut pisallu tamakkernissaanut periarfissaqarluarput.

Taamaammat Naalackersuisut kaammattuutigissavaat qassutaarsiutit ajornartorsiutaasarnerat eqqarsaatigalugu qassusersorluni qaleralinniarnep inatsisitigut inerteqqutigineqarnera aalajangiusimaneqaannassasoq. Kiisalu akisussaaffimmik siammaanikkut kommunit najukkami pissutsinut avatangiisinullu naleqqussaasinnaatitaanerata aamma aalajangiusimaneqaannassasoq. Kommunit ileqqoreqqusanik naleqqussaasinnarminni siunnersortariaqarpata Naalackersuisoqarfiga pisarnermisut ikiunnissaminut piareersimajuannarpoq. Kommunilli ilungersorlunga kajumissaarumavakka najukkami Aalisartut Piniartullu Peqatigiiffii kiisalu tunitsiviit aalisarfinnik ilisimasaqarluartut taamalu aalisarnerup eqaatsumik ingerlanissaa pillugu naleqqussaasannermut suleqataasinnaasut oqaloqatigilluartaqqullugit.

Naggataatigut erseqqissarusuppara Naalackersuisuni qassutaarsernemi aamma qassutit annaasat immap naqqani napitiffiujuarnerannik ajornartorsiutaasut pillugit assorsuaq ilisimasaqarfigilluaratsigit matumanilu aalisartut annertunerusumik akisussaaffimmik tigusisariaqartut isumaqarluta. Kalaallit Nunaanni Aalisarsinnaanermut Akuersissuteqarnermi Nakkuttilliisut paasissutissanik katersivimmik peqarluarput tassani atortut annaasat nalunaarsorneqarsinnaasarlutik, aalisartuniilli paasissutissanik nalunaarutaasunik pissarsiaqartanngillat. Ajuusaarnaraluartumik ajornanngippallaalersimavoq tunitsivinnut ornigutiinnarsinnaalersimaneq atortusanillu nutaajusunik ingerlaannartumik tunitsinnaaneq piulersimammat. Naalackersuisut aalisarnermi inuussutissarsiteqartut peqatigalugit qassutit annaasat immap naqqani napitiffiujuarnerannut atatillugu, uatsinnullu aalisarnermi taama pingaaruteqartigisumik ajornartorsiortitsinermut aaqeeqataarusupput.

Taama oqaaseqarluta Inatsisartut oqallinnissaat Naalakkersuisunit qilanaaraarput.